

5

明史考證

黃雲眉著
中華書局

明史考證

第二冊

黃雲眉

華書局

1980年·北京

明 史 考 證

第 二 冊

黃 雲 眉

中 華 書 局 出 版

(北京王府井大街 36 號)

新華書店北京發行所發行

北京第二新華印刷廠印刷

850×1168 毫米 1/32·11⁷/₈ 印張·281 千字

1980 年 6 月第 1 版 1980 年 6 月北京第 1 次印刷

印數 1—11,000 冊

統一書號: 11018·781 定價: 1.30 元

第二册 目錄

明史卷四十(志第十六)考證	309
明史卷四十一(志第十七)考證	321
明史卷四十二(志第十八)考證	328
明史卷四十三(志第十九)考證	336
明史卷四十四(志第二十)考證	349
明史卷四十五(志第二十一)考證	360
明史卷四十六(志第二十二)考證	373
明史卷四十七(志第二十三)考證	382
明史卷四十八(志第二十四)考證	384
明史卷四十九(志第二十五)考證	388
明史卷五十(志第二十六)考證	395
明史卷五十一(志第二十七)考證	417
明史卷五十二(志第二十八)考證	420
明史卷五十三(志第二十九)考證	423
明史卷五十四(志第三十)考證	428
明史卷五十五(志第三十一)考證	429
明史卷五十六(志第三十二)考證	433
明史卷五十七(志第三十三)考證	436
明史卷五十八(志第三十四)考證	437
明史卷五十九(志第三十五)考證	438

明史卷六十(志第三十六)考證	439
明史卷六十一(志第三十七)考證	443
明史卷六十二(志第三十八)考證	452
明史卷六十三(志第三十九)考證	457
明史卷六十四(志第四十)考證	459
明史卷六十五(志第四十一)考證	460
明史卷六十六(志第四十二)考證	465
明史卷六十七(志第四十三)考證	468
明史卷六十八(志第四十四)考證	475
明史卷六十九(志第四十五)考證	486
明史卷七十(志第四十六)考證	499
明史卷七十一(志第四十七)考證	531
明史卷七十二(志第四十八)考證	543
明史卷七十三(志第四十九)考證	556
明史卷七十四(志第五十)考證	570
明史卷七十五(志第五十一)考證	591
明史卷七十六(志第五十二)考證	594
明史卷七十七(志第五十三)考證	596
明史卷七十八(志第五十四)考證	623
明史卷七十九(志第五十五)考證	647
明史卷八十(志第五十六)考證	662

明史卷四十(志第十六)考證

今考其升降之差，沿革之故，具著於篇。

按本志考證，與本志內容，詳略小有出入：於府州縣升降沿革之屬明世者，並據實錄載其原由，訂其歲月；於山川之布列，考證大體從略，單文短札，偶或掇取，校其同異，無關宏旨，蓋清史稿地志述此一門，既較詳於本志，而康熙、乾隆兩次測繪地圖，使治漢志水經者有所藉手，讎對辨析，亦視前代諸說爲嚴，故不復加勘。抑山川之變，昔之權在天，今之權在人，在天，則人不能阻其變，在人，則變與不變唯其用，而變之用爲尤大，必重規疊矩，徵蘭臺以探禹迹，非自隘乎。於各地之特產，考證大體從詳，本志除據李賢等所修大明一統志、陳循等所修寰宇通志，稍錄銅鐵錫金銀諸礦產區與鹽產區外，罕及百業庶類，茲仍檢二志並他書補錄之：一以見我國幅員之廣，動植礦品物之盛，蘊蓄之厚，譬猶久秘之巨庫，雖財貨曼羨無窮，前代剝削階級多不能啓其肩鑪而發之，發而得其千之一萬之一焉，又不能用以利民而轉以厲民，神宗礦闢之禍，烈於虎狼是已。一以見前代之所謂百工，其血汗智慧之所輸，高藝專技之所呈，若絲瓷等業之騰譽遠邦者，固往往而有，然皆以供剝削階級服御玩好無厭之求，而剝削階級則寶其器而草芥其人，不僅彼等姓名多湮沒無聞，且使彼等日陷於饑寒困悴疾病死亡之境而弗恤焉。嗚呼，封建社會階級不平之恨，豈止全涌於隴畝之間哉！

京師

正統六年八月罷稱行在，定爲京師。

按八月當改十一月，見英宗前紀六年十一月定都北京條考證。

順天府

永樂四年閏七月建北京宮殿，修城垣。

按本紀據實錄，是月壬戌書，“詔以明年五月建北京，分遣大臣採木於四川、湖廣、江西、浙江、山西。”蓋議建伊始，非卽建於是月也。

嘉靖二十三年築重城。

按據實錄，此二十三年係三十二年之誤，可參閱本紀是年京師外城成條考證。又萬曆中，張位嘗請近京周圍十里，建輔城四座以衛京師，見萬曆二十年七月實錄。

西曰廣寧。

按金正西門爲彰義，新城築於明嘉靖中，其西門曰廣寧，而都人至今以彰義呼之，見周質析津日記。

宛平

按縣產煤炭石炭，又產琉璃頻婆果，見大明一統志卷一，寰宇通志卷一。以後通志與一統志同者從略。

寶坻

按縣潮河產銀魚，見一統志同卷。

涿州

按州產煤炭石炭，見同上。

房山

西有大房山。

按大房山，俗名小西天是也。隋大業間，僧靜琬募金錢鑿石爲板，刻藏經傳後，至唐貞觀，僅完大涅槃一部，其後法嗣繼之，直至完顏時始成。貯洞者七，穴者二，封以石門，鎮以浮屠。明初，太祖嘗命僧道衍往視，留咏而歸，歷代扃閉如故。及萬曆時，浙僧名自

南者，謀發其藏，簡其未刻者緒成全藏，爲沈德符所阻，謂“今輦下彫弊，不似往年，宮掖貴貂，亦未聞有大檀施，若一啓則不可復鑰，必至散佚而後已”云云，見野獲編卷二十四。

昌平州

正德元年七月升爲州，旋罷。八年復升爲州。

按正德元年七月升昌平縣爲州，從南京吏部尚書林瀚等之請也。謂“昌平陵寢所在，宜改縣爲州，割密雲、順義、懷柔三縣隸之，以便供應。”昌平改州後，懷柔等三縣免養馬雜差，宛平、大興二縣，亦以差重民勞免養馬。三年十二月，經太僕寺奏請，仍罷昌平爲縣，令宛、大、昌平三處養馬，懷柔等縣亦各養馬如舊。至九年四月，縣丞張懷具疏言民有十苦，甚切至，戶部議可，乃復爲州。並見實錄。此八年係九年之誤。

北有天壽山，成祖以下陵寢咸在。

按詳見王源十三陵記。文集

順義

元順州。洪武元年十二月改爲順義縣，屬府。

實錄：“改順州爲順義縣，東安、固安及河南輝州、淇州俱爲縣，仍改檀州爲密雲、懷柔二縣。時廷議以各處州治，有連轄數縣，有不轄縣而親隸民事者，於體未善，詔從其議，於是凡州之不轄縣治而改爲縣者六十有五。”

按嘉靖三十一年築縣城，命工部戶部共發銀一萬六千兩，巡撫都御史發本縣贓罰銀充工資，見是年六月實錄。

豐潤

按縣產鹽，有鹽場，見一統志同卷。

遵化

按縣產鐵，見同上。

新城

按新城不僅直隸，山東、江西、浙江等皆有之。其他縣名，各省相同者甚多，附舉於此：如直隸、河南、江西皆有永寧；南直隸、陝西皆有華亭，有山陽；江西、湖廣皆有安仁；直隸、湖廣、廣東皆有東安；直隸、南直隸皆有清河；山西、浙江皆有山陰；山西、江西皆有廣昌，有樂平；福建、廣東皆有長樂；江西、浙江、貴州皆有龍泉；陝西、湖廣皆有咸寧；南直隸、浙江皆有建德；山西、湖廣皆有寧鄉；南直隸、山西、浙江、四川皆有太平；南直隸、四川、雲南皆有定遠；南直隸、雲南皆有太和；陝西、湖廣、貴州皆有安化；江西、浙江皆有新昌；河南、廣東皆有新安；湖廣、廣東皆有興寧；江西、福建皆有德化；山東、廣東皆有海豐；湖廣、廣東皆有會同；浙江、廣東皆有昌化；福建、廣西皆有永福；南直隸、廣西皆有懷遠；南直隸、湖廣皆有桃源；江西、廣東皆有石城；江西、廣西皆有興安；陝西、四川皆有石泉；江西、四川、廣東皆有長寧；江西、四川皆有東鄉；山西、四川皆有大寧；陝西、廣東皆有三水；而陝西之延安、鞏昌兩府，皆有安定，江西之廣信、吉安兩府，皆有永豐，則一省中且有同名之縣矣。見錢大昕十駕齋養新錄卷十一。

任邱

洪武七年七月，州縣俱省。

按據實錄，是月，併莫州入任邱縣，非州縣俱省也。

鹽山

東濱海，產鹽。東南有鹽山。

按縣有鹽場五處，見寰宇通志卷二。

定州

按州產瓷器，號定窰，始於宋，其色白，間有黑紫者，而蘇軾試院煎茶詩，“定州花瓷琢紅玉”，是定器又有紅者。

內邱

東南有泚水。

按水經無渚水，全祖望據漢書地理志常山郡中丘縣“蓬山長谷，渚水所出，東至張邑入潤”等語，以爲內丘應有渚水。其言曰：“中丘，今順德之內丘也。太平寰宇記引水經舊本酈注，中丘有蓬鵠之山，今其地之山固巍然，是漢志所謂蓬山長谷者也。舊本酈注又載其龍騰鶴渡諸山水，今內丘圖經亦載之，則舊本固有西山諸水之原委。蓋蓬鵠諸山，縣延數百里，隨地異名，直接太行，通謂之西山，而水亦分道以出，長谷窮泉谷皆其一也。故內邱至今有渚水，一名礪水，而張縣之地，今併入任縣，有曰渚陽，則渚水之陽也。晉書段疾陸眷爲王浚攻石勒，屯於渚陽，至今稱爲渚鄉，是蓋其自張入潤之道，然則渚水固無恙耶？”水經渚水帖子東東潛可知內邱泚水之外，又有渚水，今本水經酈注多所闕漏，故史不敢據漢志入渚水耳。然清史稿地理志亦無之。

盧龍

按縣產鐵，見一統志卷五。

遷安

按縣產鐵，產丹錫，產紙，又寬河有金礦，見一統志同卷。

樂州

按州產丹錫，產紙，見同上。

應天府

皇城之外曰京城，周九十六里。

按洪武六年六月實錄：“詔留守衛都指揮使司修築京師城，周

一萬七百三十四丈二尺，爲步二萬一千四百六十八有奇，爲里五十有九。內城周二千五百七十一丈九尺，爲步五千一百四十三，爲里十有四。”與志不同。罪惟錄將作志云，“南京城周四十里”，則更少矣。又馬生龍鳳凰臺記事云：“築京城，用石灰秫粥錮其外，上時出閱視，監掌者以丈尺分治，上任意指一處擊視，皆純白色，或稍雜泥壤，卽築築者於垣中，斯金湯之固也。又於城外起土城，以爲不測屯守之計，宮中陰溝，直通土城之外，高丈二，闊八尺，足行一人一馬，以備臨禍潛出，可謂深思遠慮矣。”其說僅備參考。

其外郭，洪武二十三年四月建，周一百八十里。

按罪惟錄將作志但作八十里。

鳳陽府

洪武七年八月曰鳳陽府。

按鳳陽府治，至洪武八年十月，始遷於臨濠新城，見實錄。

中爲皇城，周九里三十步，正南門曰午門，北曰元城，東曰東華，西曰西華。

洪武六年六月實錄：“中都皇城成，高三丈九尺五寸，女牆高五尺九寸五分，共高四丈五尺四寸五分。午門東華門西華門城樓臺基，俱高五尺九分，午門東南西南角樓臺基，與城樓臺基同。玄武門城樓臺基高五尺九寸五分，其東北西北角樓臺基，亦與城樓臺基同。御道踏級文用九龍四鳳雲朵，丹陛前御道文用龍鳳海馬海水雲朵。城河壩磚脚五尺，以生鐵鎔灌之。”

按此爲中都皇城之大概。志文北曰元城，元城係玄武之誤。

又按鳳陽府以產墨名，新增格古要論卷九：“國朝直隸鳳陽府舊城大東門，有查文通墨。”寰宇通志卷九：“其製精妙光澤，他郡或有模範爲之，其真贋可辨。”

鳳陽

洪武七年八月析臨淮縣地置，爲府治。

按據實錄，是月，改中立府爲鳳陽府，析臨淮縣之太平、清樂、廣德、永豐四鄉，置鳳陽縣，此云“析臨淮縣地置，爲府治”，誤。

山陽鹽城

按二縣同產鹽，見一統志卷十三。

揚州府

按嘉靖時，揚州知府吳桂芳，建議增築外城，揚有二城，自桂芳始，見史桂芳傳。

江都

按縣產莞蓆，見一統志卷十二。

儀真

西北有大、小銅山。

一統志卷十二：“大銅山在府城西北七十二里，又有小銅山，在儀真縣西北二十五里，皆漢吳王濞鑄錢之地。”

泰州通州

按二州同產鹽，見寰宇通志卷十九。

蘇州府

按府境產錦紵絲紗羅綾香杭虎邱草蓆，見一統志卷八。又以製綵牋名。范成大吳郡志卷二十九云：“綵牋，吳中所造，名聞四方。以諸色粉和膠刷紙隱以羅紋，然後研花。唐皮陸有唱和魚牋詩云，向日乍驚新繭色，臨風時辨白萍文，魚子曰白萍，此豈用魚子耶？今法不傳，或者紙紋細如魚子耳。”一統志同卷亦著綵牋，而云，“今蠟牋畫牋尤精妙。”

吳江

按縣產四腮魚菰蓴，見一統志同卷。四腮魚卽鱸魚，同書卷九

松江府土產門鱸魚下注云，“出松江者獨四腮”，此松江當通松江一江而言，則四腮魚固非僅吳江縣產矣。

崑山

按縣產苧布、石首魚、河魴魚，見一統志同卷。又云，產黃草布、藥斑布，嘉定縣同。

太倉州

本太倉衛，太祖吳元年四月置。弘治十年正月置州於衛城，析崑山、常熟、嘉定三縣地益之。

弘治十年正月實錄：“巡撫南直隸都御史朱瑄奏，太倉、鎮海二衛，軍民雜處，宜增一州，割崑山、嘉定、常熟三縣附近人民三百十二里屬之，而領崇明一縣，下戶部覆奏，從之，命名太倉州，隸蘇州府。”

松江府

按府境產鹽，鹽場凡五處。志但言華亭、上海有鹽場。又產線綾絨毯藥斑布三梭布，黃廷鵠希聲館集有疏論松江細布之役甚苦，可參閱。及絲蓴鱸魚石首魚，見一統志卷九。

青浦

嘉靖二十一年四月以今縣東北之新涇巡檢司置，析華亭、上海二縣地益之。

按此從巡撫都御史夏邦謨巡按御史舒汀奏也，見實錄。明史稿作嘉靖二十年。

萬曆元年復於唐行鎮置縣，即今治也。

神宗實錄卷三隆慶六年七月：“復設直隸松江府青浦縣治。縣本舊青龍鎮，嘉靖間知府朱潤等，以附鎮地方曠遠，盜賊叢生，錢糧積欠，議割華亭、上海地建設青浦縣。未幾，華亭人以不得逃避錢

糧，紛言不便，鄉宦張給事中承憲者，遂奏行裁革，止設一通判駐節本鎮，而前弊滋甚，撫臣張佳胤採士民公論請復之。”

萬曆元年七月實錄“巡按直隸御史李學詩奏建青浦縣於唐行鎮報可。”

武進

按縣產秬白米，見一統志卷十。又產料絲燈，吳騫陽羨名陶錄引於琨重修常州府志，謂：“毘陵器用之屬，如筆箋扇箸梳枕及竹木器皿之類，皆與他郡無異，惟燈則武進有料絲燈，壺則宜興有茶壺”云云。料絲燈製法，見七修類稿卷四十四，然謂料絲燈出於滇南，以金齒衛者勝也，不及武進。

宜興

又有唐貢山，產茶。

按縣產墨產茶，見一統志同卷土產門。志言縣有唐貢山，產茶，則本一統志同卷山川門，以其山產茶，唐時已入貢，故名。吳騫桃溪客語卷一云，“今茶尚有而墨不可得。”又云，“大抵茶盛於唐而墨盛於元也。”縣又產瓷器，而尤以產砂茗壺著。“壺家妙手稱三大”，謂時大彬及李大仲芳、徐大友泉也，而先之者爲供春，則縣人正德進士官四川參政者吳仕之僕也。詳見騫陽羨名陶錄。張岱陶菴夢憶卷二供春作龔春。日人內田寒泉藏仲芳所製梨皮泥茗壺，其式見日人與玄寶茗壺圖錄，可參閱。茗壺蓋自明季始盛，上者至與金玉等價，其工此技而姓名尚可指數者，據桃溪客語卷三所載，僅三十餘人耳。

南有荆溪。西南有百瀆，疏荆溪之下流，
注於太湖，後多湮廢。

按伍餘福三吳水利論有論百瀆文，可參閱。

靖江

成化八年九月以江陰縣馬馱沙置。

成化七年閏九月實錄：“開設直隸常州府靖江縣。時巡撫都御史滕昭言，常州府江陰縣馬馱東西二沙，地在揚子江心，以里計，廣踰三十，袤凡七十有餘。其間舊有里分五十圖，去江陰縣治，往回江面七十餘里，風濤不測，乞於本沙舊土城內開設縣治，名靖江縣，並立儒學以訓生徒。會官覆奏如所言，從之。”

按據實錄，靖江縣開設在成化七年閏九月，與此作八年九月不同。

丹徒

按縣產零陵香，見寰宇通志卷十六。零陵香本名蕙，又名薰，唐人謂之鈴鈴香，亦謂之鈴子香，文士以湖南有零陵郡，遂附會名之，見沈括夢溪補筆談。

廬江

按縣有崑山，在縣南四十里，產礬，亦名礬山，見一統志卷十四山川門及土產門。實錄：洪武三年十月，“定徵礬法。戶部言廬州府黃墩崑山及安慶府桐城縣皆產礬，歲入官者二十二萬七千斤，每三十斤爲一引，共七千三百五十八引，每引官給工本錢一百五十文，其私煎者論如私鹽法，從之。”

六安州

按州產茶，見一統志卷十四。

英山

按縣產紙，見一統志同卷。其名榜紙者，可作紙帳，見新增格古要論卷九。

霍山

本六安州故埠鎮巡檢司，弘治二年改爲縣。

按明史稿同。會典卷十五云，“弘治七年添設”。

安慶府

按府境產鐵，寰宇通志卷十八：“同安志，漢有鐵官；唐貢鐵器；宋有同安監，歲鑄鐵錢，自端平三年兵變，冶廢。”又各縣俱產生漆桐油龍鬚蓆，見同上。

潛山

按縣天柱山產茶，寰宇通志同卷，“唐李德裕謂此茶可以消酒肉毒”。

貴池

按縣產紙，見一統志卷十六。寰宇通志卷十二作筍紙。

青陽

按縣產茶，見一統志同卷。

銅陵

按縣有銅鉛鐵錫諸礦，見一統志同卷。據梅堯臣池州銅坑詩云：“碧礦不出土，青山鑿不休；青山鑿不休，坐令鬼神愁。”知宋時已盡力採之。

按各縣俱產筆，見一統志卷十五。

宣城

按縣產茶，見一統志同卷，但以產紙著，而一統志、寰宇通志何以俱不及？

歙

按縣產硯，龍尾山武溪硯之品凡五：一曰眉子石，有七種；二曰外山羅紋，有十三種；三曰裏山羅紋，一種；四曰金星，三種；五曰驢坑，一種，世總謂之龍尾硯。以青色綠暈多金星者爲上，而近深溪者尤佳，見一統志卷十六。志蓋本之宋唐積歙州硯譜。然龍尾山實無石，好事者特以各坑石被之龍尾美名耳，亦見硯譜。又產紙，

有麥光白滑冰翼凝霜等品，見一統志同卷。舊傳澄心堂南唐烈祖徐知誥節度金陵時燕居之處紙，亦歛產，宋時不復造，但散落不少，明代乃絕無僅有矣。謝肇淛據梅堯臣謝歐陽修送澄心堂紙詩，證宋時此紙散落之多，並謂“宋子京作唐書，皆以澄心堂紙起草，歐公作五代史亦然，而今五百年間，貴如金玉，可爲短氣！”見五雜俎卷十二。郎瑛則謂陳師道後山談叢辯此紙爲徐知誥所造無疑，謂知誥子或後主所造，皆非也。若徽州志謂出於彼地，與李廷珪墨爲二絕，則誤之尤甚矣！見七修類稿卷十九，不知其言可信否？又產墨，沈德符謂近代惟新安羅龍文所作，價踰拱璧。又謂新安人例工製墨，方於魯名最著，所刻墨譜，窮極工巧，而同里程君房幾超而上之，程亦刻墨苑，鬥奇角異，似又勝方，見野獲編卷二十六。又產茶，有勝金嫩桑仙芝先春華英等七品，見一統志同卷。

祁門

按縣產漆，見一統志同卷。

績溪

按縣產銀鉛，見一統志同卷。

徐州

洪武十四年十一月直隸京師。

按沈德符以徐州爲南北必爭之地，州守權輕，兵力單薄，脫有風塵之警，立見瓦裂。謂宜改州爲府，“以其分土爲彭城縣，並舊屬邑而五，南則益以邳宿，北則益以鄆、滕、濟寧，便可屹然成壯郡。”又謂“近日李修吾中丞撫江北，亦主此議，竟以時論不同而止。要之是舉必當亟行，若遇有事更張，不免亡羊補牢矣。”野獲編卷十二。

東北有盤馬山，產鐵。又有銅山。

按宋置利國監以主鐵冶，見寰宇通志卷二十二。